

Timor-Leste

Ba tinan 27, Fundasaun Ázia serbisu hamutuk ho sosiedade sivil, comunidade no parseiru governu iha Timor-Leste. Daudaun Fundasaun foka ba haforsa governu no polítika, hapara violénsia hasoru feto, dezenvolve turizmu inkluzivu, no promove paz no justisa.



SERBISU ATU HAPARA VIOLÉNSIA HASORU FETO NO LABARIK

Programa Nabilan (Hapara Violénsia Kontra Feto) implementa husi Fundasaun Ázia ho objetivu ajuda feto no labarik moris livre husi violénsia no goza sira-nia direitu. Nabilan kontribui ba objetivu ne'e liuhosi garante feto no labarik ne'ebé hetan violénsia bele asesu ba servisu ho kualidade no inkluzivu. Programa ne'e mós apoia individu, comunidade no instituisaun atu foti asaun hodi redús violénsia hasoru feto no labarik.

Entre Janeiro 2015 to'o Dezembru 2018, parseiru programa Nabilan fornese servisu úniku hamutuk 31,857 ba feto no labarik, inklui referál, assistensia legál, teste médiku, uma mahon temporariu no longu-prazu, akonsellamentu, treinamentu hadi'ak abilidade moris, no apoiu reintegrasaun.

Programa Nabilan, parseria tinan ualu entre Governu Australia no Timor-Leste, ho prinsípiu fundamental maka feto no labarik nia direitu, no igualdade entre feto no mane. Nabilan fiar katak violénsia kontra feto no labarik bele prevene. Programa ne'e serbisu iha kolaborasaun ho individu, comunidade, sosiedade sivil, no governu ba mudansa iha longu prazu liuhosi pilár importante rua: servisu no norma mudansa sosiál. Programa no ninia atividade sira mai liuhosi peskiza ho inovativu ne'ebé hala'o kona-ba prevalensia no asaun krime kontra feto no labarik iha Timor-Leste. Nabilan maka ajuda iniciativa husi Australia no kolaborasaun serbisu ho Governu Timor-Leste liuhosi Ministéiru Solidaridade Sosiál no Inklusaun no Sekretariu Estadu Igualdade no Inklusaun no organizasaun sosiedade sivil. Nabilan mós

envolve servisu partisipatoriu iha nivél comunidade atu dezenvolve no teste abordajen foun hodi hadi'ak prevensiaun no asesu sira ne'ebé atu apoia.

DEZENVOLVIMENTSU TURIZMU INKLUZIVU

Dezenvolve Timor-Leste nia setór turizmu mak xave hodi foka ba diversifika ekonomia nasaun nian ne'ebé dependende makas ba mina. Maske Timor-Leste iha buat barak mak bele oferese ba vizitante sira, maibe dezenvolve setór turizmu iha nasaun foun-liu iha rejiaun Ázia nian la sees husi obstákulu oi-oin hanesan bareira ne'ebé tenke ultrapasa liuhosi asaun rigorozu no serbisu parseria entre governu, setór privadu, no sosiedade

Desde lansamentu primeiru ba nasaun nia *Peskiza ba Vizitante sira mai Timor-Leste* iha 2014, Fundasaun Ázia apoia peskiza hodi apresenta evidensia dadus kona-ba atividade turizmu, liuhosi ninia Programa Dezenvolvimentsu Turizmu. Programa ne'e hari'i bazeia ba peskiza jeral, estratejia, polítika, estrutura, no relasaun estensivu ne'ebé dezenvolve ho Governu Timor-Leste, doador sira no setór privadu. Ho apoiu jenerosidade husi Ministéiru Asuntu Estranjeiru no Komérsiu Novazelandia nian (MFAT), agora dau-daun programa foka ba fornese apoiu ba Ministéiru Turizmu no operadores xave iha industria ne'e, nomós implementa projetu ba dezenvolvimentsu fatin destinu turistik, ai-han, nomos turizmu kafe. Programa ne'e kometidu hodi fasilita no kontribui ba indikadóres ne'ebe alineadu iha objetivu polítika nasional turizmu Timor-Leste 2030.



TIMOR-LESTE

Fundasaun Ázia nia programa iha Timor-Leste hahú desde tinan 1992 no estabesele eskritóriu ida iha Díli iha tinan 2000.

Desde tinan 2019, Fundasaun Ázia parseria ona ho *Polícia Nacional de Timor-Leste* hodi implementa polísiamentu komunitáriu.

Fundasaun Ázia apoia partisipasaun ativu husi feto sira iha aspetu hotu-hotu ba Timor-Leste nia dezenvolvimentsu.

APOIU POLITIKA PÚBLIKU NE'EBÉ DI'AK

Hanesan nasaun foun no demokratiku, Timor-Leste nia futuru depende ba ninia kapasidade hodi dezenvolve sistema forte ba formulasaun no implementasaun política públiku ne'ebé di'ak. Fundasaun Ázia apoia política públiku ne'ebé efektivu liuhosi implementasaun peskiza ba projetu bazeia ba evidénsia, oferese treinamentu no programa mentor, no kria espasu hodi fasilita kolaborasaun signifikante entre sociedade sivil, setór privadu, partidu política, no autór sira husi governu.

Desde tinan 2014, Fundasaun nia serbisu iha dezenvolvimentu política públiku liuhosi Governu Australia nia fundu ba Apoio Política Públiku Di'ak no tuir fali mak Programa LEAP (Lideransa Emergente Apoio Política). Programa LEAP inklui implementasaun sira mak hanesan:

- Grupu Lideransa Política, ajuda hodi hari'i rede ida pensador política ne'ebé iha influénsia hodi haforsa individu xave iha formasaun política públiku. Liuhosi enkontru regular, workshop no konferénsia, fahe esperiénsia no koñesimentu husi membru grupu sira, no uza sira-nia poder kolektividade hodi rezolve asuntu política importante.
- *Tatoli! Lian Opiniann Públiku* Anuál, fornese informasaun importante ba ema ne'ebé halo política sira iha comunidade nia persepsaun ba governu, servisu, no sira-nia prioridade rasik.
- Mentor ba programa hanesan Estajiu Peskiza no Estajiu Política, hari'i kapasidade ba individu no organizaun sira iha peskiza, advokasia política, no lideransa.

HAFORSA GOVERNASAUN KONTAVEL

Fundasaun Ázia serbisu hodi hadi'ak fornese servisu públiku liuhosi akuntabilidade ne'ebé di'ak liu ba governu. Desde tinan 2012, Fundasaun susesu ona hodi implementa número ida husi programa auditoriu sosiál ba ONG lokal no sociedade sivil hodi advokasia governu sai efektivu liutan nomos rekursu ba servisu públiku sira. Husi tinan 2016 to'o 2018 Fundasaun kolabora ho parseiru ONG Forum Timor-Leste (FONGTIL), ho fundu husi União Europeia, ba iha projetu auditoria sosiál apoia sidadaun sira hodi avalia política setór públiku no implementasaun kontra Governu nia estatutu objetivu no komitmentu sira, uza evidénsia

kolektivu ne'ebé konkretu iha maneira ida partisipatoriu no inkluzivu. Fundasaun apoia dezenvolvimentu no hadia sasán rigoroza no matadalan ba koleksaun dados no sidadaun nia envolvimentu, fornese finanseiru no apoio tékniku ba ONG hodi implementa projetu auditoriu sosiál iha nasaun laran, no serbisu atu garante katak rezultadu sira iha atuaun no foti ba iha dados hodi uza durante halo política, kolabora besik liutan ho Unidade Auditoriu Sosiál iha Gabinete Primeiru Ministru Timor-Leste.

PROMOVE PAZ, HAKMATEK NO SEGURANSA

Fundasaun Ázia nia esperiénsia servisu hamutuk ho *Polícia Nacional de Timor-Leste* (PNTL) desde tinan 2009 hatudu seguransa comunidade bele sai di'ak liutan liuhosi promove parseria no kooperasaun efektivu iha polísiamentu komunitáriu . Ho apoio liu ona tinan 10 husi Fundasaun, filozofia, prinsipiu no pratika sira husi polísiamentu komunitáriu ba iha públiku no aumenta hetan valór boot iha comunidade nia laran. *Levantamentu kona-ba Persepsaun Polisia Komunitáriu tinan 2018* hetan katak situasaun hakmatek no seguransa iha Timor-Leste kontinua di'ak, reforsa husi nível fiar ne'ebé aas , konfiansa, apresiasaun ba PNTL, no progresu ba orientasaun comunidade iha sira-nia servisu. Por ezemplu, levantamentu ne'e deskobre katak kuaze populasaun enjerál (83%) no maioria husi lider komunitáriu sira (93%), no polisia (95%) hatete sidadaun no polisia serbisu hamutuk hodi tau matan rezolve problema seguransa iha nível lokal.

Fundasaun apoia ona iha dezenvolvimentu ba polísiamentu komunitáriu tuir modelu Timor-Leste nian ne'ebé kobre ona iha nasaun tomak, no hatuur ona iha kadru no política legál hanesan Preambulu lei organiku PNTL nian, Planu Estratejiku PNTL, no Lei Suku. Polísiamentu Komunitáriu fasilita husi konsellu seguransa munisipál no konsellu polísiamentu komunitáriu iha nasaun laran tomak. Iha Timor-Leste hamutuk suku 452, koloka ona ofisiál polisia suku ida-ida ne'ebé dedikadu atu servisu hamutuk ho comunidade hodi prevene no responde ba krime sira.

Fundasaun apoia PNTL hodi haforsa adosaun ba polísiamentu komunitáriu tuir modelu Timor-Leste nian liuhosi Programa Apoio Polísiamentu Komunitáriu (PAPK). PAPK, ne'ebé hala'o husi 2016-2020, implementa hodi Ministéiru Asuntu Estranjeiru no Komérsiu (MFAT) Novazelândia nia naran, no iha parseria ho Polisia Novazelândia.

Fundasaun Ázia nundar organizaun dezenvolvimentu internasionál labó luku ne'ebé kometidu bodi hadi'ak moris iha Ázia ida ne'ebé dinamiku no dezenvolve hela. Ho kuartél ne'ebé iha San Francisco, Fundasaun Ázia serbisu liuhosi rede ida ba eskritóriu sira iha nasaun 18 iha Ázia no iha Washington, DC. Serbisu ho parseiru públiku no parseiru privadu, Fundasaun simu fundus husi grupu oi-oin husi ajénsia dezenvolvimentu bilateral no multilateral, fundasaun, korporasaun, no individu.



HEADQUARTERS

465 California Street, 9th Floor
San Francisco, CA 94104 USA
Tel: (415) 982-4640
sf.general@asiafoundation.org

WASHINGTON, DC

1778 Massachusetts Ave., NW Suite
815 Washing, D.C. 20036 USA
Tel: (202) 588-9420
dc.general@asiafoundation.org

TIMOR-LESTE

Rua Praia dos Coqueiros Bebonuk
Dili, Timor-Leste
Tel: (670) 331-3457
timorleste.general@asiafoundation.org

www.asiafoundation.org